



Savjeti za popravljavanje pojedinca i društva (Meka)

Hatib: dr. Salih ibn Abdullah el-Humejd

22. ševal 1447. po Hidžri / 10. april 2026.

Hvala Allahu, Jedinom, Koji je vječan i neprolazan, Vladaru, Onome Koji je bez nedostatka, i Koji svakoga osigurava. Neka je slavljen i hvaljen, On je ovaj svijet uredio u najljepšem skladu i savršenom poretku. Njemu zahvaljujem na obilnim blagodatima koje daruje.

Svjedočim da nema istinskog boga osim Allaha, Jedinog, Koji nema sudruga, svjedočenjem onoga koji je rekao: "Gospodar moj je Allah", pa u tome ustrajao, i svjedočim da je naš prvak i vjerovjesnik Muhammed, sallallahu alejhi ve sellem, Allahov rob i poslanik, najbolji među ljudima. Neka su na njega, na njegovu čestitu porodicu, njegove plemenite ashabe i sve one koji ih slijede u dobročinstvu Allahova milost, blagoslov i spas.

I sebi i vama savjetujem bogobožnost. Bojte se Allaha, Allah vam se smilovao, i u tajnosti i u javnosti; govorite istinu i u srdžbi i u zadovoljstvu; budite umjereni i u siromaštvu i u bogatstvu; i budite pravedni i prema prijatelju i prema neprijatelju.

Znajte da je bezvrijedno svako uživanje koje nije Džennet, a svaka nevolja koja nije Džehennem zapravo je blagodat. Ko prihvati Allahovu odredbu, neće tugovati za onim što je prošlo, a ko zaboravi svoje grijehe, počinje uveličavati tuđe. Lijep odgoj je najvrednije nasljeđe, a lijep karakter najbolji saputnik.

"Ti sa svakim – lijepo! I traži da se čine dobra djela, a neznalica se kloni!" (El-A'raf, 199)

O muslimani, u Allahovoj Knjizi i u sunnetu Njegovog Poslanika, sallallahu alejhi ve sellem, nalaze se jasne pouke za onoga ko želi da primi pouku i snažne opomene za onoga ko želi da se opomene. U njima je ono što budi prosvijetljeno srce, i ono što pokreće čovjeka, koji ima razum i odaziva se svome Gospodaru.





Srce oživi ukroćenjem strasti, nemar se otklanja iskrenom skrušenošću, a lijenost se odagnava budnošću i oprezom. Onaj koji je nemaran, kada se sjeti svoje nemarnosti, pokaje se, a onaj koji je oprezan, kada razmisli o svom kraju, postane odlučan i ozbiljan.

Zato, Allah vam se smilovao, oživljavajte svoja srca poukama, omekšavajte ih opomenama i prosvjetljuje ih mudrošću. Bojte se, ukoliko budete neposlušni svome Gospodaru, kazne na Danu velikom. Budite od onih koji vole savjet i savjetnike.

Allah je pokudio ljude koji su govorili: "Nama je svejedno savjetovao ti ili ne bio savjetnik. Ovako su i narodi davnašnji vjerovali, i mi nećemo biti mučeni" (Eš-Šuara, 136–138), i zabilježio je njihove ružne riječi.

A za druge je rekao: "i opominjao sam vas, ali vi ne volite one koji opominju." (El-A'raf, 79)

Poštovani vjernici, blago onome ko ispravi svoje greške prije nego što bude kasno. Radosna vijest je za onoga ko se drži bogobožnosti i čini dobra djela. Blago onome koji loša djela briše dobrima, a propao je onaj koji svoj dragocjeni ahiret zamijeni bezvrijednim dunjalukom. Teško onome ko zanemari svoje obaveze prema Allahu.

Ovaj svijet je putovanje, zato se čuvajte odgađanja. Dani koji prolaze najbolji su opominjač.

"A Smak svijeta će u tren oka doći, ili još brže, jer je Allah, uistinu, Svemoćni!" (En-Nahl, 77)

Smrt neprestano vreba i oduzima živote. Oči su zaleđene, a duše ne žure prema dobru! Da li su srca oslijepila, ili su postala sigurna da im se neće desiti ništa loše?

O vjernici, neka vas ne zavarava ovaj svijet, jer njegovo uživanje neće potrajati. Neka vas ne zavede nada u dug život, jer je smrt sigurna i neizbježna. Tako mi Allaha, bit ćete pitani o Poslaniku i o Onome Koji ga je poslao, o Kur'anu i o Onome Koji ga je objavio. Svako će naći ono što je radio.





Život je kapital – svaki tren života koji prođe ne vraća se i ništa ga ne može zamijeniti niti nadoknaditi. Danas je djelo bez obračuna, a sutra obračun bez mogućnosti da se učini bilo kakvo djelo.

Pripremite se za kabur i njegove strahote, i za meleka i njegova pitanja. Ko će svoju knjigu dobiti u desnu ruku, a ko u lijevu?

Vjernici, dok još imate vremena i dok ste u prilici, razmislite o riječima Uzvišenog: “ali će, sigurno, vlastito breme i breme onih koje su u zabludu odveli nositi, i za laži koje su iznosili doista će na Sudnjem danu odgovarati” (El-Ankebut, 13).

Razmislite o ovom ajetu, a zatim pogledajte onoga čije je srce Allah učinio nemarnim, pa uzima tuđa prava, jede tuđi imetak i zadire u čast ljudi. A pogledajte i stanje mnogih na društvenim mrežama: objavljuju bez provjere, govore bez dokaza i prenose bez potvrde!

Razmislite o tome kako će biti kada čovjek na Sudnjem danu, među svojim djelima, nađe grijeha koje nije lično učinio! Nositi će teret njihovog činjenja, teret njihovog širenja, teret onih koji su im povjerovali, teret onih koji su ih slušali, teret onih koji su ih gledali, teret onih koje su odveli u zabludu, teret onih kod kojih je to oslabilo odlučnost, teret onih koje su odvratili od istine ili im uljepšali zabludu!

Šta će biti, da nas Allah sačuva, ako su zlo predstavljali kao dobro, a dobro kao zlo?!

“da bi na Sudnjem danu nosili čitavo breme svoje i dio bremena onih koje su, a da oni nisu bili svjesni, u zabludu doveli. A grozno je to što će oni nositi!” (En-Nahl, 25)

Čuvajte se, Allah nas i vas zaštitio, smutnje oholosti, grijeha hvalisanja i tereta uzdizanja nad drugima i slamanja srca siromašnih.

“Taj drugi svijet dat ćemo onima koji ne žele da se na Zemlji ohole i da nered čine, a one koji se Allaha boje čeka sretan kraj.” (El-Kasas, 83)





O muslimani, koliko je ljudi narušilo svoj moral na društvenim mrežama! Koliko je plemenitih žena zapostavilo stid! Koliko je ljudi na internetu odlučno, a u stvarnosti slabo! Koliko je onih koji su "darežljivi" na riječima, a škrtice na djelima!

Prava postojanost pokazuje se tek u iskušenju, a u vremenu blagostanja svi su postojani, bar tako izgledaju. Istinsko zadovoljstvo dolazi do izražaja u teškoći, dok su u lahkoći svi ljudi zadovoljni. Kada se željeno ostvari, svi su sigurni i puni samopouzdanja, ali kada se ono odgodi, tada se razotkrivaju kolebljivi i nestabilni.

U javnosti svi ljudi djeluju kao čestiti i pošteni, ali u osami Allah najbolje zna šta rade.

Allah se smilovao i obradovao one ljude čije su težnje bile uzvišene, čija su srca bila čista i koji su se čvrsto držali puta svoga Gospodara, zato se na takve ugledajte i njihove postupke slijedite.

O vjernici, ne ostavljajte istinu da biste ugodili ljudima, i ne mijenjajte se radi njihovog divljenja. Najbolja opskrba za čovjeka je smirenost u duši, svjetlost u razumu, čistoća u srcu i ispravno razmišljanje, a najveće blago su dova roditelja, iskren prijatelj i braća koja te ne zaboravljaju. Ako se ne pojaviš, oni će se raspitivati za tebe, ako se predaš nemaru, oni će te upozoriti i nikada te neće zaboraviti u svojim dovama.

O vjernici, škrtac skuplja imetak, a drugi ga troše. Onaj koji ogovara skuplja dobra djela, a drugi ih preuzmu. Težina ibadeta prolazi, a nagrada ostaje. S druge strane, slast grijeha nestaje, a kazna ostaje.

Fudajl ibn Ijad kaže: "Što je grijeh manji u tvojim očima, kod Allaha je veći, a što je veći u tvojim očima, kod Allaha je manji."

Znak uspjeha je da činiš dobro, a bojiš se da neće biti primljeno, a znak propasti je da griješiš, a nadaš se spasu.

Cijenjeni vjernici, najbolji među vama su oni najljepšeg ponašanja, i oni koji uče Kur'an i njemu podučavaju druge, i oni koji su najbolji prema svojoj porodici, i oni koji najviše koriste drugima. Najbolji prijatelj je onaj koji je najbolji prema svom prijatelju, najbolji komšija je onaj koji je najbolji prema svome komšiji, a najbolji među vama su oni koji su najmilostiviji prema onima koji do njih klanjaju.





Blago onome ko u svome srcu ne nosi mržnju, i koji ne zna puta do neprijateljstva. Susret s njim donosi radost, njegov govor donosi sreću, a druženje s njim je dobitak.

Blago i onome koji je shvatio da je život, ma koliko bio dug, u svojoj suštini kratak, i da u njemu nema prostora za svađe, netrpeljivost i osvetu. Takav je zaokupljen preispitivanjem sebe i popravljanjem onoga što je propustio. Među ljudima živi čistog srca i duše, čuva sebe i koristi drugima, lijepo se ophodi, spreman da prešuti, pređe preko greške i oprost.

Allah vam se smilovao, činite dobro sebi kroz činjenje dobrih djela, čuvajte i oplemenjujte svoj imetak dijeljenjem i sadakom i činite dobro svojim rođacima i prijateljima tako što ćete prelaziti preko njihovih pogreški.

Požurite ka dobrim djelima i natječite se u pokornosti Allahu. Trudite se u onome što će vam koristiti, oslonite se na Allaha i ne klonite duhom. Snažan vjernik bolji je i draži Allahu od slabog vjernika, a u obojici je dobro. Kada Allah zavoli Svoga roba, On ga uputi, bude mu dovoljan i zaštititi ga.

A ko je uvjeren da će napustiti ovaj svijet, priprema se i opskrbljuje za ono što dolazi.

Uzvišeni kaže: "Oni koji iz bojazni prema Gospodaru svome strahuju, i oni koji u dokaze Gospodara svoga vjeruju, i oni koji druge Gospodaru svome ravnim ne smatraju, i oni koji od onoga što im se daje udjeljuju, i čija su srca puna straha zato što će se vratiti svome Gospodaru oni hitaju da čine dobra djela, i radi njih druge pretiču. Mi nikoga ne opterećujemo preko njegovih mogućnosti; u Nas je Knjiga koja istinu govori, i nikome se nepravda neće učiniti." (El-Mu'minun, 57–62)

O vjernici, čuvajte svoju zajednicu. Pazite na jedinstvo. Klonite se onoga što unosi razdor. Ima mnogo onih koji čekaju vaše greške. Licemjeri šire zlo, a zlonamjerni uveličavaju greške. Držite se zajednice i pokornosti svojim pretpostavljenim. Ko napusti lojalnost, odvoji se od zajednice i umre, umro je džahilijetskom (paganskom) smrću.

Zato se bojte Allaha, Allah vam se smilovao.





"KOLIKO GOD ZNAČAJNA ULOGA HATIBA BILA ZA USPJEH NJEGOVE HUTBE,
NIŠTA MANJE NE ZAOSTAJE NI ODABIR TEME, ODNOSNO MATERIJJE
KOJU TOKOM HUTBE ELABORIRA." (PREPOROD)

HUTBE 

Donosite salavate i selame na darovanu milost i nepresušnu blagodat, vašeg vjerovjesnika Muhammeda, Allahovog poslanika, sallallahu alejhi ve sellem, to vam je naredba od vašeg Gospodara: "Allah i meleki Njegovi blagosilju Vjerovjesnika. O vjernici, blagosiljajte ga i vi i šaljite mu pozdrav!" (El-Ahzab, 56).

